

課慎堂文集

文集 散體

卷之六

卷之七

卷之八

誌表

書

箋牘

辛

課慎堂文集卷之六

墓誌 墓表

光祿大夫太子太保兵部尚書兼都察院右副都御

史總督湖廣軍務繩武公墓誌銘

祁州孝廉非有刁公墓誌銘

上谷周澄字父子三先生墓表

生潤潤生成功成功生如挺以曾孫貴俱 誥贈榮祿大夫生思忠是爲公考仕至禮部左侍郎以公貴 誥贈光祿大夫妣佟氏少保兼太子太保吏部尚書盛年嫡姊 誥封一品太夫人宗伯公子五長榮祖公其次也生而端毅笑言不苟有至性晨昏問視未嘗一先父母食寢稍長喜讀書夜誦每裸膝跪以防倦睡以任子入太學祭酒薛公所蘊一見大驚曰真濟世才也李氏若寧遠伯偉矣不謂乃復有此順治五年授戶部員外郎時公年甫二十勤敏稱諸曹最諸部長亦勿敢以公年少而忽公明年以理事官使西郵迎遠人來服者道關中開府孟公喬芳奇公

禮遇有加謂名位且當出吾右九年遷都察院左僉都御史甫浹旬有屈軼神羊之目朝右肅然時宗伯公 賜騶奉家居公朝受訓以出入必以所效告宗伯公掀髯顧公笑曰若解忠斯解孝謂若不能祿養我耶明年遷兵部右侍郎兼副都統舉前大疑難人所不能決者一切應機立斷 世祖章皇帝以詢閣臣事御五鳳樓衆對不無首鼠公侃侃敷奏 世祖大悅顧謂侍臣曰如此人始堪大用耳朕數聞此人有才畧良然當是時國家德威洽暢畿南千里內外俱稱乂安而西接太行東連滄海廷議設重鎮於大名控之謂非其人莫克任 世祖曰才孰如李侍郎

者十一年正月遂命公以兵部尚書兼都察院右副都御史總督直隸河南山東軍務值大霽雨河決沁衛洛漳滹沱泛濫漂沒廬舍東明館陶臨漳等處流民呼號載道守令張目垂手一策無所出公至歎曰昔大禹引水溺爲已溺今何敢推諉耶屢疏陳苦狀請賑令有司多方安插存恤賴全活者數十萬人先是賊高鼎倚恃五臺太行諸險要偵官兵進退爲出入傍郡縣屢被侵害禁旅出討無功廷議命公會山西督撫合兵搜勦公具疏曰賊衆不過數百且無甲騎特恃險爲出沒難踪跡耳裹糧采躡彼將閃匿以老我師非完策也臣愚以爲宜緩圖之先察賊出入

所由多設防禦俾其出不得掠則內宥入不得聚則外疑然後用反間鄉導以賊攻賊直搗其穴自成擒矣此兵法所爲出不意攻無備也奏上廷臣持其議三奏乃允公如法設施賊大困十三年五月公使井陘道陳安國往以朝廷威德諭之許其自新鼎感泣詣軍門降而馬家樓滿家洞東明西華諸寇次第皆就消滅事聞 世祖褒之紀功大常將士及鼎官賞各有差兵燹後田野多蕪 朝廷設屯員招徠闢治意殊美而奉行者濫冒邀功闢不二三輒報倍蓰及新租入以虛畝剝民加以包勒百姓不勝累相率逃亡公察知劾罷諸員豁租入民獲安全者數萬衆

山東故多豪右大蠹每伺有司輒以奸貨利公曰不虎啖
是問而問鼠嚙何爲者劾一豪右不法狀置大典杖殺大
蠹龍文昌等時大旱至是甘霖立沛人以為公誅蠹合天
意云公爲總督三載平數大寇爲民請命者再四抨巨奸
鋤大慙由是三省士民頌聲大作 世祖謂侍臣曰李總
督盡心愛民百姓頌之使得人人如此天下何患不平會
王師進取滇黔倚三楚犄角客兵數十萬供億不貲需宏
才總理之因復 命公以原官加太子太保移督湖廣當
行猶疏請設三全鎮以安畿豫於滿家洞立營以安山東
於大沽祈口北塘月坨設烽堠以安天津其爲 國家綱

繆未雨如此行之日三省民數萬號哭遮留車爲枳公流
涕婉轉慰諭三日乃得發趨京陛見 世祖大嘉獎美錫
賚逾等退而起居宗伯公告所治三省事視顏色俞咈祇
聽訓言夔夔若循朝典無何宗伯公卒公哀毀骨立三請
終喪不許遂涕泣赴楚受事信郡王兵牧荊州馬數十萬
故事樵薪皆民是給荆民苦甚公言於王曰王爲國家出
爲民耳王兵馬勿令擾民民且頌王 朝廷必大重王王
名實兩得信郡悅令兵馬終事無得擾荆民經畧洪公承
疇謀深入餉繁請用民運 旨移公公疾馳軍中謂洪公
曰兵入因糧於敵用民運大不便兵馬日需餉數千石民

運路遠歷水陸險阻二旬不能一至一至不副三日用將必庚癸呼此不便在兵且餉急民疲擔負日久雖壯者必多道斃壯民斃而老弱安所賴以濟而餉且絕此不便在民尤在兵若因敵糧我兵皆知不破敵不可得糧進必勇勇則所到披靡糧不可勝食或再用輓運法以備緩急則萬無一虞反覆論說洪公避席謝奏罷民運時安荆一帶堤決民無舟楫幾爲魚公舉內舍船載錢米分途救濟漢景潛沔橫溢民皆露處波濤中公具疏請賑秋又大水復備陳情形以民所食菱粃進呈 世祖憫然大發帑金賑蠲所全活民數與北東明館陶等處埒其進菱粃疏畧曰

水灾情形已於前疏入告仰沐 皇仁矣不料八月水濫更甚江沔方數百里百姓魚鱉咫尺上下形黑無衣皮黃無肉咽菱粃哽而致斃臣目擊取嘗棘喉裂吻真鄭圖所難繪賈涕不勝流也此皆臣奉職無狀所致何敢辭誅滌慮待殛履冰集木但恐下誠淺薄勿能上格謹以菱粃冒死進呈伏願 堯仁致倣禹德垂憐益懋庶徵引咎六事上回天意下救民生疏上 世祖嘉納而二三台垣交章論公公卽引疏自咎報聞反奪論者俸李自成遺孽郝姚等潛據竹房秭歸蜀楚間餉道不通大兵進取謀勦撫未決公指畫全蜀形勢入奏會楚兵出夔陵者由水路出襄

陽者或由均州或保康出鄖陽者渡江以南以便抵房川
陝兵亦水陸並進會地止齊以防賊南渡江川入土司又
令西安滿漢官兵或由興安或分路堵截使賊不得西趨
至河南協兵令總兵官統赴襄陽聽調撥以杜乘虛突犯
之計謀定各路滿漢兵四面響應公督帥諸軍相機勦撫
諸寇或授首或歸命川江南北遂靖後之蕩平滇黔其功
實皆由此公督楚二載餘視督三省時多不三閱月而所
救拯勘定勲不啻百千過之且當軍興蠶午外決籌策內
理糧餉既勤國計復恤民情加以海警安南將軍以船八
百爲將伯呼大兵班師征南將軍需船靖寇將軍需餉而

江南督撫更移咨備寇公一一應酬咄嗟立辦然精血耗
矣又念宗伯公尚在厝三年不得終制而太夫人高年缺
侍朝夕百端交集疾遂作疏乞骸骨不許至再三始 俞
允北旋之日楚人士扳臥轅轍倍於三省行時歸杜門謝
賓客朝夕力疾怡顏色侍太夫人左右說古來忠臣孝子
得之父母訓者用博太夫人歡卽太夫人以公顛悴問亦
婉辭以對懼貽太夫人憂時順治十七年庚子也辛丑
先帝大行公感知遇恩哀過慟病遂劇內侍扶公憇朝廊
向之論公者遇公慚謝康熙元年壬寅卜葬宗伯公於保
定府完縣西鳳樓山之陽甲辰佟太夫人卒公慟毀一如

宗伯公越月殞公號泣曰天乎天乎吾年甫三十六而仕至官保而乃不獲以祿養父母耶嘔血數升不幾日亦卒嗚呼吾嘗疑公在朝之日什七在家之日什三爲國忘家古大臣皆然沒後而天下思之悲之宜矣至於里黨族戚哀傷廢飲食者何也衆皆曰吾儕懼兵燹後離散者公完聚之子弟之失業者公教誨之勤督之有緩急不惜割祿美而均分之卽今歿尚求貸而殯吾因是益歎公之敦親睦族爲不能已也微論公終始無晷刻不念父母卽往公爲僉憲時長兄棄世世職次當及公公以已巳通籍弟輩尚爲儒生因固讓宗伯公乃命季子受襲後爲提督卽以

其職贈曾祖及祖皆公以孝德爲讓德所成也推之族戚所云固其至性又何疑乎公生於某年月日卒於某年月日娶某子孫男女嫁娶所出俱如狀公鐵面戟鬚聲如巨鐘風規巖巖雖燕私無惰容君子敬慕小人忌畏歷仕執法不撓當大任益恬穆而剛果時見或謂勳高未永似由此而不知公之嚴厲仁者之勇聞在三省時賊劫犴狴引重囚併去囚于死法不從公爲奏釋之在楚豫撫檄會勦以左道作亂者公曰倡亂者一人耳脅從皆愚民奈何爲崑岡焚耶亟止之殲其魁餘悉放歸征南兵有獲民婦女者公勸令放歸不聽給以犒師集衙署驀遣家健登船搜

出婦女數百口簿其姓名籍貫給資斧送還其家凡若此者所謂仁者非耶公容辭若包孝肅觀記若張睢陽掌兵事謀定後戰若趙營平虞升卿鎮撫若寇子翼應煩劇若劉穆之持重守潔以爲僚屬標準則若謝東山杜如晦如云執法嚴直將亦必曰若廷堅氏在堯代可矣公卒之後數年天下思之相率籲 闕求人名宦而崇祀公是皆宜銘銘曰景運啓兮降世祥膚功奏兮歸 帝鄉施未竟兮殞杜羊數不延兮摧陵岡星嶽巍巍兮勲名之崇光松柏青青兮奕葉之孔長長發何所兮鬱鬱葱葱鳳樓山之陽

祁州孝廉非有刁公墓誌銘

余於公神契久未獲親炙容光癸亥孟夏余師五公王先生抵予蓋爲先慈誌墓石也冬杪其子再濂奉其兄再雍所述行狀過宥或請銘時王先生病謂余曰非有三十年老友生有志節器量廓然今且死余又病非假名筆無以留生面將安志吾悲乎欲藉子誌其墓幸勿辭予於是再拜受命按狀公諱基命字非有避廟諱改包字蒙古別號用六居士刁系小興州永樂間徙大戶實內地諱中徙居祁州歷九世州學生天錫生宗仁宗仁生琢琢生子二長翼庭拔貢生清操不仕樂育人材旣歿門人鄉里建報德

祠私謚貞惠先生是爲公父公生穎慧六歲授三字經一日而畢繼教以書輒成點畫稍長日誦千言弱冠入泮二十五領丁卯鄉薦屢上公車輒躋嘗曰時人人也古人豈遠時文也古文豈難人不古若而儼然鬚眉直行尸走肉耳文不古若卽掇高科登顯仕優孟衣冠耳遂從事古文詞闢書齋城隅若不甘晝粥斷葢隻美千古題額曰潛室亭曰肥遯除昏定晨省外雖盛暑嚴冬手不釋卷自經史秦漢下族分部解必剖根本見始終總不爲章句糾纏故文亦空明駘蕩恣肆汪洋然弗詭於矩度文益奇名益噪家亦益落而學日益勵一言一動必與古人爲期遐邇

執經問業者屢滿戶外設科條課士孜孜不倦一時人文蔚起辛巳貞惠先生病歿三日絕飲食幾不欲生母安太孺人再三勸慰始勉進一盂彌月鬚髮盡白治喪葬悉尊古禮三年不茹葷酒不御內一至哀號路人爲之感涕崇禎壬午遇變公倡大義晝夜冒鋒鏑誓死勵衆守必破之城抗方張之勢卒賴以全敵退公收男婦千餘人給廩資遣老僕王才等六人送還里臨遣八拜重其託才等誓死奔命各得安其室迄今猶切尸祝云甲申逆闖入都城帝以社稷殉設主服斬衰朝夕哭奠時賊以大任脇公不肯就迫愈甚而拒愈堅繼以一函矢死誓詞語激烈親友繞

床泣諭公但瞑目不語會我大清兵入賊衆潰滅方得解歎曰少攻詩書欲以功名顯故額其室曰潛曰遜豈知竟殲今日遂視功名潛誓不啻凡十科皆以病辭當事袖程金委之曰君以是作公車費至半途就不就由君意且不冒時嫌何固乃爾耶公曰今有女子受人聘而欲無適人適人而欲不薦枕席不娠育不父其父祖其祖能乎當事歎息去庚寅容城孫徵君挈家南遊過祁公館之報德祠左朝夕討論上下千古二年如一日丁未太孺人病公親嘗藥餌蚤夜告天願以身代已終不起毀瘠如貞惠喪食無鹽酪居無瓜剪踰小祥不勝哀而卒公晚年研究易

理凡前後著作劄劄行世者有斯文正統十二卷用六集十二卷辭選書七篇尚有未刊者藏於家公生於萬曆三十一年十二月二十四日卒於康熙七年十一月初一日得年六十有六元配李孺人繼于孺人繼許孺人子二長再濂李出娶黎城縣知縣杜公某女次再洛側室宋出娶安平縣生員馬公某女女二長適涇縣縣丞喬公某長子生員某次適延慶州守備趙公某子某嗟乎偉才天挺節義性生未得發揮萬一而竟齋志以沒五公夫子之欲志其悲者將在斯乎抑自離經辨志而君臣大義民社阽危行藏一一分明亦可以無憾矣故爲之誌而系以銘銘曰

年兄弟析產獨取其磽瘠德植而不顯才弘而不達人莫不爲先生惜也娶董孺人後先生歿長君顯斗少聰敏失怙能繼父志承顏左右讀書根據名理雖年少遊泮而勤耕讀足跡不入公門淵識雅量遠近從遊者一如澄宇先生終其身不求倖進年六十三以順治十年癸巳某月某日終門人私謚貞靜先生子二宗振德振仲君光斗資穎如父兄年十四卽補博士弟子員每試輒冠軍補廩庠才瞻而學富性篤而道茂兼擅詞賦之雄當時學者咸比之眉山父子云君與兄顯斗俱授經名族獲俸廩供母甘旨丁卯鄉試房考陳公得君卷以元薦主司欲置魁列房考憤而袖以出人皆爲君惋惜君曾不以得失隳念摩奮彌勵然僅以副車終遂賫志而歿年三十九以某年月日終子一卽公振與兄顯斗柩同祔於先塋禮也嗚呼世有樹德崇隆懷才英粹而艱於遇者不少矣然天能以是困於生前而終不能沮之死後今觀先生父子行爲人宗言爲人表而且孝友化於里族儀型著於房帷視蒙誥負義徼榮取辱生無足稱死不蓋愧者不尤優乎不文之辭用以表幽隱而使神靈感通於不昧云

上直撫軍郭公書

上于大中丞書

與毛大可太史書

上于大中丞書

上大學士京江張公書

上少宰彭美門先生書

上總河大司馬于公書

上佛制臺書

上常學士書

答常學士書

上少司馬孫作庭先生書

課慎堂文集卷之七

書

銀城李與祖廣寧著

受業陶

岐文治

古黟王 楫汾仲定

男

鰲又白

較

上梅溪徐太守書

六年深荷帡幪裁報缺然午夜捫心主臣實甚客冬復蒙雅愛注存感泐何極名宦事煩煩遠引不惜餘力與祖之心與行事先生固已洞若觀火而傅粉之醜言之汗下近讀邸報不惟興祖一人如杵臼春胸料十七屬亦莫不驚訝吐舌柳下惠之直雖中墨於當時而龔遂之績自旌白

於後世第愧迂愚頑頓無回天轉日之力註誤之由遷謫之疏皆不敢聞問惟知曾參非殺人者耳抑先生數十年勞於政務天蓋假此以成晚節俾嘯傲山林批抹風月或亦造化運用發覆後學之一端也一麾政不足爲先生重輕昔裴潛留床陸續載石古人誇爲奇行使在今日能保無膏唇拭舌乎先生以仁政受惡但恐海內搖手相戒以清廉正直爲禍首耳因憶某在鬲津時先生賜手教做官惟守令難爲今日守令尤難斯言實堪三歎柳宗元思報國恩獨惟文章某亦願倣倣遺踪而圖酬報於萬一先生或不以爲狂瞽之言而吐棄乎夏日溽暑風塵勞苦伏惟努力強飯自愛臨穎不勝依切之至

上崔夏章宮詹書

老先生高標峻品超邁羣倫在朝負鹽梅舟楫之才在野嗜泉石烟霞之趣輝里閤而鏡寰宇誠一代山斗也某素切瞻韓曾於京邸操筆登龍計得一覲清光不意造謁未遇無緣御李可勝悵快及老先生解組旋里正圖就教適以風木之悲讀禮苦塊遂致青壁丹崖徒切翹企耳茲啓新城王介祺先生畿內名流某立雪雖未久而春風一拂勝若十年奈天靳斯文玉樓遽召某之管見未能窺其萬一老先生素以道義文章稱至交必稔知其節操敬求一傳以垂不朽非斯人不足徵老先生之文非老先生之文

不足傳敝老師之生面倘不吝如椽一字千秋永鐫金石
是豈唇頓舌叩所能罄其私耶行狀呈覽仰祈郢削幸勿
惜點鐵為感臨楮無任翹切仰企之至

(Faint bleed-through text from the reverse side of the page)

寄毛大可太史書

都門渥領塵教耿然在懷兼獲清商不啻十部從事興祖
曷以報國士哉日月如駛睽範倏更歲籥榮結之私如轆
轤輾轉胸次仲夏一緘奉候聞又請假南旋雲泥迴越而
瑯琊便道台旌竟不枉顧豈有心遐棄與抑命棹從流不
及一返顧耶邇來道體安和福祉倍豐無庸遙祝惟台臺
玉珮瓊琚輝映中外恐鏡湖山水不能長擁雙屐耳某碌
碌黃塵中如蠅螂轉丸言之殊覺削色所有新舊拙作數
帙深慚嚼蠟因老先生推轂士類甚殷故不揣庸妄伏乞
開廸俾得鉛中金益匪淺鮮矣茲因陶令親之便肅勒附

狂瞽見罪也鮑子知我幸再惠教

答淮楊道魯謙菴書

某前爲屯田一事激切詳陳總因海州西都百姓于得江等數百人連名哀控瀝血號天某目擊心傷情不忍默者蓋以 朝廷設官分職凡以爲民某雖忝司捕盜正所以安民民不得所將必爲盜則捕之不可勝捕矣故不避罪譴冒昧面請孟浪越詳蒙以天地好生之心賜允轉詳事雖未濟陰隲實弘不惟西都百姓結草銜環卽某亦感恩靡涯詎意上千天怒河憲以西都一帶皆某之衙役在憲臺自有耳目某亦不敢強辨惟此心可對天日若以某爲贖贖之極則誠贖贖之極矣且嚴批提拿正身經承某捕

盜末員原係奉 旨新設一切詳陳俱係親操筆墨況屯田詳請出自某本心書吏亦無由知也伏祈憲臺委婉詳覆爲某留一線之地感恩不僅沒齒倘河憲天威不霽再行提拿某卽親詣臺下雖加鐵鉞奚避焉臨稟可勝惶恐之至

寄王聖安書

猶憶高津月夜豪飲縱談今古不覺鼓掌深許足下爲海內有心人時復慷慨憤發私心謂當並翔雲衢相爲終始豈期一涉宦途遂成睽隔山川修阻鱗鴻隔絕吾輩交情何等而忽忘棄如遺竟同悠悠行路者哉昔人云海內存知己天涯若比隣謂夫形體雖隔精神相通也夫人於朋友之際合則喜離則悲此常情耳至於輔吾仁成吾義久要不忘千里如面此則非離合所能圍也是以遽使以寡過攄欵征臣以靖共致望其相與又在形體之外夫豈山川所能限哉某自客歲分符淮沅清苦自甘雖限於智能

設施多所不合而此心皎然不敢自欺務求所以上報吾君下慰吾民以無負曩昔與足下所講求而藏之心者奉爲規矩是某身雖與足下相睽而心固無日不與足下相接也惟願足下念茲勿釋雖位卑祿薄勿以身家爲念素位而行盡其當然倘值風便示我良規無負鬲津言志時雖君子務暗修不求人知而心迹潔白俾人謂我兩人以道義相終始卽目前有離羣之悲而異日相見猶是本來面目則千秋一日同此精神同此形體又何間疎之患哉足下獨無意乎一函敬訊眠食健善日征月邁相期砥礪區區之懷百幅難悉臨池曷勝神飛

寄管公式書

前賢有言得一人知己可以無憾又靖節云安得素心人相與共晨夕是知己固難而與知己相晨夕又難之難也某生平愚朴得交當世賢豪不啻數十輩至於情義融洽若將終身則惟兄輩二三人可不謂真知己耶憶昔閭里相望晨夕過從酒載楊柳之濱歌發桃花之圃予倡汝和竟日忘返豈非千古樂事哉一行作吏遂至離羣簿書鞅掌塵垢撲面折腰倒屣忙無寧晷迴念曩昔遊從如天都仙觀何可復追耶千里一函聊抒積愫倘不憚呂安之駕遠辱枳署以罄渴私庶不遐棄我也署冷囊澁曝背莫將

區區之懷難以幅罄

寄杜孟南書
不經濶別不知同羣之樂也不任獨勞不知助予之益也
曩者言笑一堂相與資藉或論說經術或商確風雅花晨
月夕綠酒紅燈日用之常安之而已分袂後子處荒岑疑
無與晰事無與商奇無與賞勞無與分如瞽之無相車之
無輔登躋者之無筇竹迷途者之無南指動憂顛蹶居悵
孤危馳想光儀不啻天上明霞雲中皎月回憶舊歡其爲
懸絕何如耶遙知閉戶潛修自多精進倘翻然命駕再一
惠顧以豁鄙私則玉成之誼萬倍常情矣一函敬候心與
俱往北望停雲曷勝企切

產稱貸猶虞不濟惟有咬定菜根以清白兩字爲報効但
蝸涎都盡枯朽難支不得不向知我者陳其愚悃時已及
瓜例當量移然而外吏不能自陳循途尚待所舉悠悠者
旣不敢妄覬猶幸附夙昔之知於臺下則如王陽登朝某
雖不敢妄比貢禹而彈冠之意後先竊有同情某亦稍知
大義豈敢涉私特思昌黎有求薦之書而以人事君薦賢
爲國古人於此未嘗指爲妨義意者仰藉鵬風庶可以下
鼓鷲翼倘荷推用人之意洞悉遠吏微思曲加提拔俾得
尺木階之則引掖之德銜結又不足云酬也萬祈垂示指
南昂首雲霄曷勝瞻佇

荅連恕菴觀察書

在昔敬仲受鮑叔之薦而感分金之誼曰生我者父母知
我者鮑子千載而下論敬仲者必先稱說鮑子某何敢妄
擬敬仲而秩散地遠月囊風袖較敬仲當日不啻過之幸
賴鼎言噓植俾樗櫟蔭於鄧林邇者上臺逾格垂青噢咻
披拂飲水者安敢望江湖哉至於前扎上瀆亦猶涸鮒乞
波茲復蒙汲西江其何敢固却以負仁人之德而虛尊者
之賜乎拜領誌慨圖報當何日也銘刻之私河山並永臨
筆曷勝瞻切

答王孝廉書
不睹紫石稜者三載停雲梁月何能已於懷耶慕老抵署
訊及道履知客冬偕計致歎劉蕢意者天欲老其才以當
大用所望益加淬礪耳捧讀翰教字字珠璣言言金石直
令弱骨頓健弟僻處寒暑冰蘖自矢恐一念墮落爲有道
所棄置故於苦處作甘勞處爲逸分所當盡者無不竭蹶
爲之例所當取者概行謝絕午夜捫心頗堪自對聞江南
撫軍爲兄夙契幸托曹丘爲弟緩頰崔先生崔化泰山梁
木之悲氣結而不舒者數夕雖然尚有典型吾輩可溯流
而尋源也王老師傳吾兄猶存胸臆間足覘倡明深心幸

急圖是禱空函率答惟祈原諒不悉

答管公式書

雪梅餞歲風柳迎春尊甫道履定與時俱茂足下天生潔骨高出世塵品行文章昭垂千古視弟竭蹶官邸束縛名利場觸藩自困者何啻霄壤正企慕間獲翰教如暘者之啜甘露不覺色起清理學宮一段非學品已造聖賢堂奧誰能殫精竭力無所爲而爲之若是哉兩廡中高置一座矣敬佩敬佩弟僻處偏隅名雖做官其實修行日無事讀古文數頁製詩半篇以消硯磊欲探索聖賢真脉絡無由得有道君子一指點乃於簿書中如屯田之利弊保甲之清嚴不憚嘔心瀝血切實詳陳思所以安民除盜了目前

心事卽肩觸忤之譴解綬歸田更足暢夙志也足下才識
經濟久著寰區所一酌可否某自當黽勉從之耳拙詩併
詳稿錄呈幸嚴削擲下勿作護前想臨筆曷勝瞻戀之至

答龐雪厓中翰書

先生鹿門峻德駿足弘才萬卷啓焚魚蓮燭炳紅綾之飯三
台古隱豹荔裳拂綠野之尊望起東山實以仁爲己任名
齊北斗兼思善與人同所謂彬彬表風雅之宗卓卓樹人
倫之範者也弟深慚寡陋難辭白豕之嘲仰待品題庸長
青萍之價乃逢童子歲試多恐頭惱冬烘致有遺珠焉免
抱玉幸荷南車示指當令北冀空羣將以收天家之榷楠
敢曰植私門之桃李微論全璧必高錄之但是完篇不敢
屑爾至於吟咏尤愧粗疎因求郢匠之斤遂弄班門之斧
惟冀垂龍門之誨勿嗤等蚓竅之聲三讀恩隆百朋感甚

與以有成耳不佞永懷先生恐嫩行或久而湮亦曾私撰一傳藏之二三年未敢發視今錄以相質昔中郎欲賦靈光見延壽而削藁而今則珠玉在前弟猶以魚目混者實欲高明摘其不合以爲規爲勸以成不佞不甘自棄之意服膺先生之教而敦夙好之不敢忘也佳咏直逼高岑但不佞謏劣其何敢當懸之座右以比良箴臨復赧切

上江撫軍宋公書

恭惟台臺韓范勲名歐蘇學問隨地而施霖雨落筆而走龍蛇都省之東北與江之西南沐膏澤而詠勤苦者亦旣二十年於斯矣某素蒙垂盼久竊承顏未遂操筆之私常懷掬溜之願雖戴若二天而隔以千里屢欲躬親部領仰沐恩勤良辰不與夙志多違所以對梅花而思廣平過長安而望神父也洪州風景一返於古非台臺之薰育陶甄何以幾此舍弟令會昌地劇才促恐不勝任伏願省錄收撫以振頽靡越分逞詞有罹嫌忌惟恃海量能涵不揣冒昧乃爾臨稟曷勝悚切

之意必無一民不被恩澤然後得遂如饑如渴之仁第恐勢有難及力有不逮既求徧濟必行徧查微論錢穀有限將曠日持久未被災處之饑民告哀不已已被災處之饑民先成枯魚矣卽如交河詳請東光未被災饑民應否行賑一案蒙憲批州縣饑民不論被災未被災一概查明入冊均賑豈非覆載無私一夫予咎之大德哉然獨行之東光則猶易爲力若槩行之各州縣未被災之庄村旣一端則凡未被災之州縣又將援例約畧計之卽河屬非數萬金錢數萬糧石而不敷而各府所屬更須鉅萬此項米奉旨出自捐納現今捐納寥寥將來不定多寡若待捐後

行賑其情難以刻緩將欲那動萬一捐納不足憑何補銷恐於國計有缺亦非百姓之福也竊以今日之賑不難在行查而難在銀米如但並查未被災饑民而不早計銀米所出專待捐納一項積日累月江水涸鮒兩不相值是未被災之饑民虛惠無補已被災之饑民實惠先悞也愚計似莫若以現在借領之銀兩並現在捐輸之穀石先卽遵旨按被災各州縣庄村查明真正饑民口數立行賑濟以救朝不保夕之命其未被災庄村饑民另議查賑庶被賑者沾實惠未被者有後望國計民生兩無所病或亦安上全下一得之見也頂戴知遇冒昧披瀝犬馬之忱伏望垂

察仍冀憲俯賜批示臨稟不勝瞻戴悚慄之至

吳奎

之難另

不勝

與毛大可太史書

先生爲文壇宗匠海內濡毫染翰之士莫不拜奉矩度某
 何人斯猥以蚓竅蠅聲溷瀆雷門迺蒙盛心曲譽旣錫以
 鴻章又重以高咏此誠接引下士婆心某敢不以牟尼珠
 引照五內耶昔孔顓草讓表謝元暉自折簡寫之語稚圭
 曰是子聲名未立當共獎成無惜齒牙餘論是言也後人
 莫不感之念之今先生成我之誼視元暉更加殷勤有生
 之幸敢忘展効哉陶友旋里附候景禧一芹將意並望笑
 茹外拙稿一帙殊昧體裁仍求大匠郢削文詞數冊俟繕
 完時續呈塗抹附驥行遠實厖鄙懷諒先生樂育啓蒙必

斧斤也敢因令弟孝緒冒昧自陳所著詩文四十卷蚓鳴
蛭吟誠不足數竊欲希大君子數言定其是非庶使突奧
之質得仰晞於白日泥塗之姿遂受濯于清源拜手鏤心
不知所自伏祈鑒其愚誠錫以箴規某不勝懇切悚惶之
至

上總河大司馬于公書

自廁門墻追隨恐後而遷置如碁不獲親承警效卽曾屬
下僚又以道里疎濶無從趨奉指使忽忽數年間慚形愧
影有負 君親不足爲吾師齒也然居官守道一步一趨
未敢越規逾矩一言一行未敢背理違心動念兢惕恐罹
負乘之羞是某服膺於師教也亦已久矣逮吾師秉 國
憲明黜陟儀型百辟整肅羣僚天下仰望風采若日星喬
嶽而闡幽起滯同升諸公又皆英髦俊彥是吾師之求賢
如渴不啻姬公吐渥之勤也某守株山左晷刻觀望不得
悉聞威聲然而竊自思維累受顧念沐浴休光踪跡久遠

無以少報知遇是以遑遑不寧投軀無自今幸旌節東指
密邇車塵或可藉以供鞭策質雖駑鈍尚足竭奔走効馳
驅也竊以河工向爲冒進之區徑竇之營其來已久而躡
取多方趨者如市類皆紈袴膏粱未嘗知物力習事機蠹
國病民實由於此是以厯 九重之憂特推轂我師澄清
而釐剔之吾師先聲之震足使此輩奪魄然而任賢使能
相助爲理又不可不精於器使也亦惟我師虛懷廣納故
敢進其狂瞽幸恕其直諫而振其愚頑某雖不敏終不敢
自外於高厚也臨稟不勝惶悚屏營之至

上佛制臺書

當送憲駕榮發時望雲瞻日情不能已如嬰兒初失父母
啼笑無依且闔省軍民號思累月凡有心胷者靡不知感
況某尤屬感恩知己者哉迄接邸報捧讀諸疏救困除弊
追曠職返流移不顧時嫌不惜物忌非憲臺具大識力大
擔當孰能回天返日若是耶竊有陳者某濫屬下僚蒙顧
眷者二年矜恤勸勵最殷最渥且屢蒙獎薦有加無已
是某以後之身皆憲臺生成之身也方日夜頌禱之不遑而
容有他腸耶邇者因鹽臺主分外追求而妬者沓然相侵
某但獨力擔承並無片語及他人不知飛語何從誠恐流

入尊聽有曾母投杼之疑第思奉侍左右周旬浹歲曾有一語及同列賢愚否及同列者尚無而敢有玷言及憲臺耶此不待辨而知也兩司心甚不安有稟上瀆某恃憲臺諒之深知之悉不敢多贅惟祈賜照原情因道途遼隔失候憲安反蒙屢齒下詢感銘益甚茲特遣小仵代叩崇階不腆聊效獻曝所叱入是禱

上常學士書

從違芝範寒暑遞遷星霜屢易二十年來筮風塵之末路隔雲路之仙班精神耗於案牘筋力疲於奔命徒饜祿食空負官常回念昔者抗手詞林同班部署而今邈若雲泥感慨當何如也台下衣染天香身親 黼座視草鸞坡雲霞生色宣麻虎觀金石霏聲千秋大業豎建清時誠丈夫得志之爲也旂常載績鍾鼎銘勲所不遠矣翹賀翹賀花晨月夕思挹風采若登嶽而摘星辰泛海而阻波濤縱欲傾耳鞭心了不可得昨家兄信至云台下進秩玉堂加銜金馬手額頻申頂踵加耀弟之所以寤寐于臺下所謂知

言慎堂文集 卷之七 二十七
已之感非泛泛於彈冠結綬取邀於一時將欲以不朽望
台下上報 國恩下光友族文章事業並耀天壤使弟亦
得以蠅附鞭隨叨餘榮於日月也弟近來亦好讀古求得
經史數十種當簿牘之暇則時時覽誦頗見聖賢用心與
士君子立志之分著述并詩文亦百餘篇哀次未成未敢
奉獻台下學富識遠金匱石室必多撰述第恨未能奉誦
爲悵耳古人云不患身名之不立而患志業之不修此弟
以自勵亦敢以之進台下淋漓肆筆冒昧忘嫌恃台下之
知我也拜函傾倒翹企萬千不宣

答常學士書

昨日寸緘馳奏旣欣知己升 朝亦念睽違太久一鳴賀
悃再寫離懷塵鞅匆遽中荒言窘幅區區之私萬一未展
乃蒙瑤函寵賁垂注勤拳獎借諄諄叨榮逾甚而君子撝
謙之度更冲然溢於行墨捧讀之下且感且佩且自慚也
每念古人相思輒千里命駕若采蕭采葛尤寤言不忘誼
篤友朋末有不心縈臆戀者憶曩年訂交迄今將三十年
而星睽雨判已踰二十年交最深而別最久回思夙昔文
酒交懽道義交勉其樂何如能無戀戀今雖地相阻而情
不殊下駑服鹽身縱不能自致於賢友之側一道懷來然

而五雲多處乃是三台每誦古詩情與俱往生平砥礪共
有素心此前札所陳實願大君子之宏模峻德輝映當時
使廿年風雨故人得奉標準以圖景從其爲欣幸不啻燕
雀之羽仰沐德輝之照矣小仵傳諭知驚回祿頗擾清懷
辱知辱愛如弟曷勝扼腕雖不敢效柳州之走牘於參元
而仰冀達人善遣尤此中所切切注懷者灰飛燼息之後
經理定自多端卽不奉台旨而分憂正在吾黨況重以尊
諭乎不腆微芹聊佐寸需伏惟哂存專泐馳候臨不勝勞
勞結

上少司馬孫作庭先生書

秋色慚佳遙憶硯溪村畔山蒼泉碧詩料倍添老先生翫
翠筒端不知又增瑤篇幾許惜未得捧函快讀懷羨徒深
矣不揣耽句之癖又偶聚敝幕吟朋遂有唱酬諸作率爾
災梨伏念老先生當代宗工不敢匿醜敬請教削并專懇
賜以大序俾虫響蛙聲得藉鴻章以不朽豈直榮踰華袞
哉奉到一帙尚屬稿本詩亦未全因亟欲就正故卽緘呈
非敢於草率賜序時仍祈擲下當另裝本專送也中有彭
孝緒名開祐者係敝門人曩某承乏瀛郡時彼爲瀛令因
其吏治明潔聲在民口曾兩以上考入薦牘惜未果行今

年以州牧之例量移勞苦七年欲暫息未補因留敝署素
 以詩文見賞於都下名公卿有刻稿數種附呈台電并祈
 郢削至其久欽山斗本渴擬登龍緣在敝齋未敢令其叩
 謁伏惟原鑒肅泐布竇臨穎馳依

課慎堂文集卷之八

牋牘目錄

答江夏廣文張石虹

東緯真黃明府

與鄧公遴

東開一

與詠菴熊明府

答陳秀才

答朱秀才

答中州孫靜子進士

答陳茂才

東孟南

答陳秀才

答李聖用

寄馬開一

答陳秀才

東天予周明府

寄渥水管公式

寄文甫昆仲

東黃緯真

寄夏青字

寄王獻甫

上又弓胡先生

寄渥水諸友

東槎儔陶祠曹

寄震青族孫

上胡又弓先生

東中翰王瑞明

東馬開一

候楊湛子給諫

寄毛大可太史

東霑化木齋李官詹

寄霞城

寄杜子孟南

寄陳子玉

東杜子孟南

答霞城

寄王瑞明中翰

寄緯真黃明府

答魏蓮六

寄長源姪

寄陶文治

壽霍玉調都護

答魏蓮六

答霞城

東陳國鎮

寄贛榆君拱柴明府

寄蒙章方令

寄張漢孺州牧

東管公式

東王文甫

寄王曙光

寄惠印可

答董翥先

東紹衣胡太守

東敬庵賈司馬

答張漢孺

東西平靳司馬

寄長白三姪

上學使愚菴李洗馬

答毛大可太史

寄董靖之

上學使愚菴李洗馬

與蕭介石學士

與東郡祖洪九

與彭孝緒

上佛制臺

答方伯李駿公

東邵大叅子昆

東武太守天柱

寄馬開一

課慎堂文集卷之八

牋牘

銀城李興祖廣寧著

受業陶

岐文治

古黟王 楫汾仲定

男

鰲又白

較

答江夏廣文張石虹

久疎問候積塵千斛忽接華翰曷勝加額草草各資不以
輜褻見哂幸甚何敢當謝昔蔡明遠鄱陽一校耳當顏魯
公絕糧江淮之際戴米周之魯公憐其意答以尺書明遠
賴以傳是弟之慇懃於年翁者亦冀援明遠例得數字耳
今果如所願謹珍貯書篋作清玩謝謝近時瑤草仍祈便

中錫教曷勝翹望

東緯真黃明府

前承沃愛兼惠隆儀揆之道義益為過分感謝感謝瑞雪
霏空條風轉律足下行春布政時竹馬郊迎何樂如之上
谷之行當在春期幸過草舍剪韭一話生平掃榻以俟餘
不盡

與鄧公遴

昨過貴邑風景如舊徘徊顧盼不勝依依復得故人相聚
一罄平生游目聘心何快如之歸來每一念及不覺神飛
色舉也獨是入祠一事辭之不能當之不敢雖尊翁併劉
襄老道義至情在不佞則未免感愧難安耳幸各叱名致
謝臨筆依依

東開一

杓迴北斗銀漢生輝律轉東風金堤布暖足下與諸賢棲
神馬帳談叢發流水之源縱性牙琴筆陣引崩雲之勢較
弟滯跡東臯沉形南畝者奚啻天壤今欲淨掃塵榻屈邀
鶚立和尚同諸君枉駕一光蓬華至於詞吐珠璣偈示甘
露則諸公分外之賜也倘蒙不棄希示的期臨穎不勝翹
企

與詠菴熊明府

昨承寵顧匆匆未罄鄙私抱歉殊甚良辰夙志竟又多違
始知閒之一字爲難得耳日滿林臯香生花縣足下此際
行春日曠神怡何啻勾漏稱仙令也便鴻附候不一

答陳秀士

郊遊回亟向兒輩索佳作卷未展光射數武幾不知霞彩
從何飛落稍定乃知爲吾兄新詠也小巫焉得不氣索哉
然貧兒慕富實甚卽擬春遊二律呈教非敢言詩聊作拋
磚耳竚望金聲幸惟勿吝孟老一紙併往不盡

答朱秀才

佳句截錦裁雲光華射目如見温李當年填詞雄傑爽峭
又寧遜張尚書獨步哉杜孟老慕虎頭久矣粗扇欲借門
下作滄州卧遊惟勿拒是祝

答中州孫靜子進士

老社臺家學淵深文章品行超軼人羣與渥水諸知交每
言及輒爲起舞亟欲就正奈道里修阻未遂披芝然無日
不作天際真人想也接翰教如覩卿雲弟學識迂疎過蒙
獎掖悚歎何似王老師遺稿欲訂成帙乃弟子分內事但
恐徒托空言耳諷詠佳什字字珠璣幾欲剖腹雖未窺全
豹而理學真諦聊見一斑翹首夏峰益令人切斗山之望
弟叨任淮堯間縱萑苻多警此心頗有把握自矢飲冰茹
蘖不敢有玷清白老社臺倘不我棄轍環至止樽酒論文
滌我塵囂實大快事也泐函曷勝神馳

答陳茂才

佳作朗吟數四奇情快論不覺拍案叫絕非爲寒酸開路
徑實爲千古英雄長聲價也正當與廣莊論並傳欣佩欣
佩

東孟南

足下攬轡西山親知時共歡讌兼攜僧高詠載酒興言筭
 中所藏當與楊雄太冲爭富矣况值丹桂飄香諸公將數
 十年牢騷不平之氣盡揮於今日其為得意更何如耶弟
 謹備茅柴以待先折一枝者弟的於二十二日入都他事
 容面悉但近來日理田家事言之殊覺削色諺云上山擒
 虎易開口告人難頗為不謬諒足下自能會意餘不復贅

答陳秀士

承惠名花慙無金屋謹置膽瓶中朗吟清平三章不覺精
 神頓爽但玉真千古國色仍宜貯之金屋不吝而遺淺近
 士豈花之有遇有不遇耶抑弟之不應遇而幸遇耶謝謝
 朱益之吾道利器屢承台命敢不凜遵恐盲瞽無知悞他
 人生平有愧斯文正統耳惟年翁裁酌拙作並呈由廸不
 盡

答李聖用

接手教具見虛懷善下益令人心感在弟亦非敢自任爲
足下益友獨是足下念尊先人一段苦衷自當以老成持
重待振家聲因道義骨肉之誼故敢露其區區也足下高
明其領我乎言不盡意統惟涵炤不宣

寄馬開一

數月不覩芝眉暮雲春樹時切瞻思兄臺俠腸義骨范張
古道於今未泯弟心服久矣至胸縷岳盤非連榻數十宵
不足悉其萬一今小築告竣頗曲折靜密一榻高懸并祈
大和尚折葦一渡請白足跣趺其上揮談十二部以代七
寶須彌恐甘露醍醐喉吻不堪人間味耳然素叨慈護諒
不輒褻我也未功不當欲速須作聚沙磨杵以期必就卽
人天亦當相助昨索丹砂是欲勾漏我也願作八公之雞
犬呵呵

答陳秀士

足下當此時雨秋風定盡收入樽俎揮為千古絕唱矣弟
 連日既苦俗冗抑且遠客絡繹而至未遑傾談覺鄙吝復
 生適惠金魚不惟茅屋竹籬添一番文繡更可生莊惠濠
 濮間想也謝謝

東天予周明府

昨經貴治承足下惠愛再三感不去心歸來復值瑞雪霏
 空床頭煨倚紅爐竟博得家人合掌斯皆足下賜也聞之
 當如何捧腹乎肅此鳴謝不既

寄渥水管公式

年臺學品純潔才識超軼自不待言而清風峻節跳脫塵外若天際冥鴻弟景仰高標非一日矣雖屢瞻芝宇而金石未訂鄙願殊歉今小築初成總無奇花珍石案頭琴瑟架上詩書差堪披玩敬屈文旆辱臨燭輝月影下調絃吟咏促膝長談了此一段公案豈不大愉快哉萬勿峻拒乃見蘭交拙句竊附江雲草本呈政極知布鼓意在聆鳳噉故不避宿瘤之醜耳訂証徑借大名弟固不敢比左氏而社臺不卽爲元晏乎諸公佳什並祈攜示臨楮曷勝顛望

望

東坡先生風韻

寄文甫昆仲

年臺學優養邃識卓才雄允矣大宋小宋展哉難弟難兄准擬雙題雁塔駢集金門爲蘭譜光乃紅綾餅賜暫稽時日亦按圖者之罪耶雖然干將莫邪並是神物延津浪沸化龍有期年翁道力深醇諒不以目前得失作倅佗也客冬一晤芝眉迄今春暮未瞻光霽梁月之思時形夢寐幸小築告成敬屈雙軒辱臨把酒談心燈前蹈舞醉後謳歌何樂如之幸勿叱距乃見石交弟原非沉湎於酒者因胸中磊塊日倩麩生消之耳已易腸矣希轉青眼臨穎顛望

東黃緯真

鶴骨松姿咸稱茂宰鸞笙栢酒聚慶良辰幾欲躬叩崇階
 効華封之祝奈俗冗羈縻不克如願聊備葑儀遣伴進祝
 望南山當尸之辰聽北闕蜚聲之日而壽身壽國壽天下
 端兆於此矣無任瞻依

寄夏青字

握別十旬渴塵萬斛然江帆馬足未嘗不思聯床把臂時
 也弟自蒞事以來民地荒涼風俗頽弊日切臨深履薄之
 懼至眾口嗷嗷待哺尤不暇給奈何奈何草此附候不盡

寄王獻甫

吾輩論交認得道義二字真切雖跡有未明此心自可相
質涿道並轡後兩人肺腑開朗如鏡拂塵所愧謏劣謬膺
淮堯接壤地創始維艱日切冰兢正資教益而兄臺又設
帳於蒲雖喜吾道之漸南其如弟之茅塞何教之誨之幸
無吝壁光一線爲貧女照耀宣晴也臨穎欲吐不盡

上又弓胡先生

老先生春風滿路呵氣如蘭當此律轉陽和撫良辰而介
景福可知也某樗櫟庸材叨列捕職且蒙格外栽培人孰
無心能不銜結自受事以來目睹百姓憔悴四境荒涼誓
甘飲冰茹蘖但綏緝無術如瞽人背月而走暗途不勝警
惕所望示以指南俾無落榛蕪中實厚幸也敢曰海上成
連僅移我情哉

寄渥水諸友

渥水遂城可朝發而午至者然猶以不獲晨夕聚首爲憾
况遠隔千里而有不動室邇人遐之嘆乎臨岐與諸君握
手話別情逾骨肉所致望於弟者以爲任膺創始如盤根
錯節始別利器卽弟亦勉力從事仰副至意詎意蒞任來
風俗頽頹求一賢士大人共挽風教了不可得所謂析薪
尋斧濟川資舟者總歸烏有螳臂獨當何能勝耶至地方
荒涼烟村僅見而弟之蛙竈塵釜亦因與爲寂寂晝夜焦
勞不遑寧處求如昔者泛舟湖上對月溪邊竟成隔世因
便以寄苦衷空涵瀆聽祈恕疎畧不盡

柬槎儔陶祠曹

客冬飫領塵誨茅塞頓開睽違半載時切瞻依邇來薰風
遐暢台臺福德日新不察可知弟樗櫟散材謬膺新設正
如野鹿入市不勝駭觸盲人乘馬最虞傾顛所恃阿咸文
老才識綽優諸事諳練但荒邊寒暑凡百疎慢爲愧耳尚
此佈候不旣

寄震青族孫

大兄字來知阿郎之變不覺魂魄驚飛咄咄怪事其何以堪然生死定理天壽定數賢侄孫英雄氣宇智勇心胸自當推勘得破與時排遣勿蹈西河之轍爲望耳昔陶潛五子皆不事詩書商瞿年四十後有四子鄧伯道去子留姪竟致無兒子之有無賢不肖非人所能强者然能恢先業振家聲者亦不在多如以阿郎之殤而流以過戚不幾令人笑兒女態乎况因父師之督責輒自投環其性情之褊窄執拗可知矣假使有祿度未能光大門閭且我輩一生功名富貴究竟是邯鄲枕中事見得透並已身亦屬幻景

遑恤其他卽以此身論親生之君成之思所以報君親者正未有艾浮漚風浪較君親孰重萬惟加餐自玉餘棕再佈北望神馳

上胡又弓先生

某猥以樗櫟得與狄門桃李共沐栽培坐風立雪未必如此厚幸矣前者星輶北上分宜躬効鞭弭載歌驪駒奈值憲件鞅掌遂失寅餞碌碌如某不膜外置之得毋孺子尚可教乎且喜密邇德星鱗羽往來備知闔宅福履時為加額第翹首烟霄闕侍杖履天際真人實勞想望恭賀榮補一芹展私幸毋鄙輶褻也臨楮神馳不悉

柬中翰王瑞明

紅艷蟠桃綠濃椿樹馴鶴亭畔欣瞻洛社耆英靜山園中快覩香山佳會李之平泉何以加此裴之綠野不啻過之先生真地行仙哉弟原擬躬進霞觴賡歌崧嶽奈蝟冗羈馵未獲飴丹粒作雲中鷄犬缺望何似恪具芹藿敬頌千齡雖云不腆以當安期棗麻姑酒定知滄桑之籌可滿十屋里言麤筭聊代南鳧幸勿障面曰廣寧塵污人也伏惟笑納無任躍忭

東馬開一

知己兄弟離隔不百里尚切室邇人遐之思况南北分途
迢迢千里動經歲月愴結更何如耶別來倏踰三月吾兄
功成九轉陞遷在指顧間耳弟抵任以來目擊荒涼中心
蘊結筆難殫述惟竭蹶盡心無貽曠職羞耳嗣後德音頻
寄慰我勞思肅此佈候不禁神馳

候楊湛子給諫

端人正氣丰裁凜然敬仰之私切如星嶽某臨行叨誨諄
諄迄今銘感近閱邸報知又銓掌科不禁手額台臺淵才
碩德遠邇具瞻且獲上信友者已久秉鈞黃閣直旦暮間
耳某以樗散猥膺新設悚惶蒞任如理亂絲台臺倘出經
濟之餘俯賜指南拯我迷途感德不啻渡蟻哺雀矣謹此
耑候曷勝瞻依

寄毛大可太史

玉筍仙班金閨儲望青藜燃杖人驚蓬島之星辰紅葉翻
堦獨醉木天之雨露暫司簪筆旋晉調元某學未到家無
異繩樞草舍文不足色何殊月露風雲客歲拙作呈教刻
畫無鹽顧乃自羞辱蒙不棄慨賜郢削檢閱至再如坐春
風化雨中感謝不盡聞台臺有告假之舉某寂處郊境攀
仰無從倘肯迂道過荒署開我茆塞俾頑石點頭亦達摩
一揮塵之力耳端此恭候不勝翹切

東霑化木齋李宮詹

曩者承乏無棣密邇霑邑日切景行未獲就正迄今耿耿
家母誕辰承瑤章遠錫銘曷極及候補時擬登龍叩謝
兼吐積愆不意遭風木之慘匍匐苦次惟與申之先生心
維口誦而已接聖用來扎備道先生眷注不棄葑菲感藉
無地又捧讀贈黃舍親壽言莊雅簡切言本經史真先輩
正宗也珍之篋笥奉爲秘本敝老師行狀草創呈閱其中
不無蕪陋恐失本來面目伏祈嚴加點化使鉛汞轉爲金
丹敝老師賴以不朽則存歿均感無旣矣端函附候不盡
欲言

寄霞城

聞賢姪獲書升登仕路喜而不寐者數夕賢姪氣體冲和
加之策勵明秋桂花香裏聽歌鹿鳴愚亦與有榮施矣勞
瘁艱難備悉前函但未知何日是出頭時回想渥水蕩舟
荷香芰綠把盞臨風殊覺仙凡之隔矣悵結何如遙想杜
孟老不啻望歲已有耑函更祈慇懃爲禱

寄杜孟南

遣价耑迎不肯枉顧而調饑之念刻何能已吾兄杜門潛
養自得師資學品益見精純弟僻居荒署孤陋日甚雖欲
秉筆覩縷茫無端緒居官又如蚊翼負山午夜捫心實難
以對知己也邇因困乏無可爲報恃能諒我不加責耳羽
便附候不盡

寄陳子玉

雪消冰渙陽回律暖足下坐梅室痛飲豪吟佳句定滿錦囊矣某僻處偏隅遙憶把臂聯床交歡如昔不啻邯鄲枕中事耳積臆如山筆難殫述里言呈教聊申悃愫亦可資足下一噴飯也臨穎瞻湖之至

東杜孟南

巖風助冷苦霧添寒日與鶚立上人擁爐把酒論生譚禪每以不得足下鼓掌爲憾署中無事欲將王先生遺稿細加訂証爲剗劂地非足下助我其誰與託弟官如嚼臘欲向書中求一生活探索聖賢真脉愧無有道君子點化輒搖搖不定惟翻閱經史以消此長日月耳桃溪柳浪定堪游目騁懷尚肯移玉以豁塵襟尤所願也至心中曲折可以意會而不可以言傳相見時再爲披陳不腆聊佐椒觴勿笑輶褻里言呈教情見乎辭

答霞城

寒餘冬雪暖釀春風梅英柳色煥然一新闔府福履亨佳
不蔡可知賢姪青年精進學業定益純熟僕近來無事得
磨勘受窮一法惟詩書足以解煩愁益性情朝夕效童子
伊唔暇則爲陶侃運甓頗覺可味賢姪其領我乎承囑自
當留意不盡

寄王瑞明中翰

前過貴州欲詣珂里聆塵談又恐擾靜居徘徊中止先生
淵源鄒魯潛心理窟羽翼經傳鼓吹休明所稱祥麟威鳳
者非歟弟一官如嚼蠟鬱鬱無似每憑詩書陶寫又恨酣
情蕪語見哂大方敢集蟲吟中有和徐健庵應制二首做
元微之生春二十首倘不吝教俯賜斧削臨穎瞻企

寄緯真黃明府

停雲梁月人所難忘况弟與親家契則金蘭誼則膠漆又何能一刻忘耶淹滯荒陬問候疎濶所恃鮑子知我不以形迹拘督也聖老至署展讀大札存注慙慙兼悉政績茂著欣慰何似及閱邸報旋陞五馬更喜而欲狂詎管貢禹彈冠慶哉尤有言者聖老歷托宇庇凡飲食居處俱荷周匝一聞榮擢五內生輝窺其意爲親家喜又不能不自爲慮而難言之情格格於中在親家高誼薄雲始終無替而弟復諄諄及之者亦願附於道義相式之末也積愫疊悰不能一二

答魏蓮六

得過珂里飮聆塵教如士元遇德公叩洪鐘而識音響也何快如之特以塵冗迫人未遑暢悉高論孰謂作吏人不俗耶郎君惠顧丰采言詞直儷仲謀獅窟無凡毛哉所愧蹄涔莫潤奇鱗惟冀鮑子知我不以白臉見責耳五公著作已托新安杜孟南選較矣今承扎諭足徵同心尊刻拜登庸圖展効率復不盡

寄長源姪

前接手札知賢姪道履亨嘉及闔宅康吉爲慰賢姪體貌
魁梧向有中滿疾固由憤激之氣鬱胸臆間而虛之一字
亦復不少蓋百病乘虛而入病不自來何因而來病不自
去何因而去去來之際病者自知亦病者自治人能將精
氣養得完足則百病自消且世間稱心事原自無多語云
知足不辱知止不殆恕字一言可行謙卦六爻皆吉我輩
卽位列公侯將相到撒手時皆邯鄲枕中事耳况時命之
顯晦天也豈人所能爲哉賢姪英雄氣骨智勇心腸自能
看破無庸喋喋矣秋暑相交容易傷人伏惟敬慎慰我遠
懷愚蒞任來經營之苦不堪縹緲恐聞之徒亂心曲耳臨
穎馳戀不盡

寄陶文治

同舟南下詩酒流連亦一時快事忽爾言歸不禁黯然載
 咏文通之句魂更為銷矣想歸省兩尊色笑偕康斑舞餘
 閒寄情山水加以琴瑟在御繾綣房帷樂自難忘獨不念
 寒衙苦宦時呼將伯者乎晤期原訂仲夏今已露白蒹蒼
 何文旌尚未發耶遣役敬迓勿再遷延方見稽呂深情不
 以修阻為勞也掃榻以俟弗負翹企不宣

壽霍玉調都護

綵弧懸月畫戟凝犧政老親臺崧岳誕瑞之時海屋增籌
 之日也弟快覩摩銅欣懷拜石效野人一芹之獻攄華封
 三祝之忱伏冀丈人峯峻不拒微拳將軍樹大能羅小草
 喜躍同於鶴舞佩戴不啻鰲擎

答魏蓮六

足下清風亮節表冠人羣後學仰泰山北斗久矣向於申之王老師得聆鴻名雖聲氣不隔而須臾未披固無日不作天際真人想也客歲辱承佳什因冗羈長安道未遑裁答至今感愧交集某匏繫淮魯僻道日與萑苻爭利鈍賴此心頗有把握飲冰茹蘗甘如飴矣簿書餘暇卽看書寫字無他念可岐至於聖賢真脉絡又非門外漢所得妄窺也足下擔荷大道闡揚絕學與孫杜兩徵君一時並耀著作等身便中幸勿吝寄烏絲一紙呈政聊見鄙忱蒼蠅附驥得至千里然而無損於驥者則於足下有厚望焉

答霞城

賢姪青年精進學業定應純熟愚近來無事日磨勘得受窮一段非詩書不足以解塵煩故朝夕尚作小童子咿唔態陶侃運甓惜陰頗覺可味賢姪其領我乎

東陳國鎮

足下鴻名斗望海內景仰前歲一謁龍門獲聆塵談如龐
士元初見德公叩洪鐘而聆巨響也竊幸道範常親勉附
後塵乃令羈馭官場遙想丰神可望而不可卽不啻龍在
雲中倍切瞻慕某時命坎坷授任淮魯岑偶日與萑苻爭
勝負於此而曰無爲鳳寧爲梟返諸素期酸顏實甚計惟
誓甘淡泊率前人之業斷不肯自負負人以貽知己羞簿
書餘暇看幾句書寫幾行字至聖賢真脉絡則於足下實
有厚望耳足下潛心理窟抉微闡奧與鹿太常孫徵君杜
紫峰前後輝映擔荷大道著作如林倘便中惠而寄我俾
耳惟足下念之

寄贛榆君拱柴明府

昨承枉顧蓬葦光輝兼聆塵教塵煩俱滌荀令坐處常馥
馥留三日香信然但杯酒盤餐輜褻良多忝屬知己定諒
史雲塵甑也款段六匹已蒙金諾耑役馳上以供驅策鮑
叔知我幸勿緩汲西江耳臨穎瞻切

寄蒙章方令

前承枉顧草茅蕪穢魯酒菜羹竟屈年翁一餉雅談至今
席間猶氤氳也佳篇珍襲齋頭光鋹閃爍如干將莫邪但
愧識埒醢雞不能窺江海淵淳耳弟和徐健菴應制二首
倣元微之生春二十首錄呈郢削兼求鳳臧持布鼓而過
雷門響固不敵然黔驢之技止此年翁得毋擲地曰虛有
其表臨穎瞻企

寄張漢孺州牧

午月初旬謁道憲卽圖一晤飫聆清談而台駕遄征充郡
悵惘者久之過擾盛筵且白飯青芻僕馬皆飽迄今銘感
生邇來無事細玩佳篇字字金石言言珠玉何意人間復
有廣陵散乎里句錄呈郢政刻畫無鹽顧乃自羞忝屬戚
誼諒爲藏拙中有和徐健菴應制二首做元微之生春二
十首兼求郢削佳篇亦望賜教毋曰薰蕕不同器而謂潘
岳丰姿非孟陽所得混也臨穎主臣

東管公式

連日接塵誨足慰生平第日月如駛轉盼卽成今古所謂
光陰似箭虛度者多矣今奉鑑書一部稍助披覽樽前月
下之餘或可當昔賢於晤對間也會鶚立上人更希叱致
不宣

東王文甫

別遠會稀結想停雲常情猶不能遣况吾輩氣誼在流俗
外者乎疇昔把臂論心抵掌斯文原期相為掖持追踪祖
劉豈謂謬縮半通僻在山陬海澨與萑苻爭利鈍賢豪足
音徒勤瞻望惟祈風便惠我好音以慰遠懷令弟壯遊曾
旋旆否並詢近祉地遠心邇如奉左右臨池不勝依切

寄王署光

契濶之懷常情不免况弟與吾兄契比幽蘭情堅白石豈
泛泛論孔李者比哉弟以庸才而當要害諸事棘手雖苦
淡自守而日益艱難如沿壁蝸涎眼見枯竭所望高軒過
我賜以指南不啻空谷足音也积署雖寒當為掃榻翹望
翹望

寄惠印可

詩云風雨如晦鷄鳴不已既見君子云何不喜此言聚首之甚樂也當其相聚雖陰雨晦明亦覺可喜况當佳麗風景又何如乎由此推之離羣索居自難爲懷花晨月夕倍增感慨耳且生平好友如印可者温文摯性淵才茂學何不動人思乎薄宦天涯聚首難期感昔傷今情何能已華翰遠及如親覲面出入懷袖紙角出毛漢老音耗久不相聞春樹暮雲殊增悵望至於萍梗雖異苦况應同然髯叅短薄相與有成若弟孤影隨形空對寒山片石咨嗟何時奮起榆枋得共紅燭青茜守抵掌終宵作一大傾倒也不盡

答董翥先

前過德里遂邀下榻燒燭傳觴漏盡十刻渥欵殷殷縱談今古誠千秋佳會也喜極感極自愧未有尺寸復承嘉貺遠頒益增顏甲佳作遵命商確管中窺豹焉測全文幸諒聲氣之雅不以狂妄見責所謂真知己不在形迹間也臨池悚切

東紹衣胡太守

春仲樞謁始得識荆兼承渥愛大慰生平奈迫於歸帆未能飫聆鴻誨而喜幸之私不啻荀家爽作御歸也舍親賀理昭實托福星照臨冀得仰瞻尊崇未易輕突因得荒署以一函先聞者倘蒙推分俾置牛衣一坐不獨桃李沾光狄門卽某荷知己倍於敬仲戴鮑子也不盡

東敬庵賈司馬

春仲得一把晤快話平生豈異祖劉聞雞時哉歸棹匆匆致虛渥誼想知己必於形跡外宥之舍親某爲寅臺舊交道過荒署盛稱大德將往樞謁附函仰候兼佈謝悃至於某求教之意在寅臺友義薄雲自加優異弟又何瀆聒說子遷之嗷嗷乎臨池神越

答張漢孺

爨烟幾斷年臺以石煤續之免蛙遊其中勝於雪中炭錦
上花也高情卓越安邑而弟則不逮仲叔遠甚榴花吐艷
荷萼傳香想案牘餘暇定多佳製倘勿吝而賜教之滌我
煩囂多矣肅此鳴感不宣

東西平靳司馬

寅臺驥足高展直軼龍媒龐士元不得專美於前矣欣羨
欣羨劉丞至署盛道注存雅誼某與寅臺聲氣好友祖劉
着鞭相期共勵乃兩治相望不踰百里而把晤伊阻停雲
梁月何能已於懷耶謹附寸函仰候興居積緒渴悰百幅
莫悉

寄長白三姪

前者相見團團頭坐話家常追談疇昔數說兒女大小快甚誌銘碑傳不朽大事原稿雖典雅可傳而多所闕畧恐先猷泯沒咎在子弟因摺撫遺事另爲誌銘於傳則增補其大而刪其衍至於碑作法最高稍去一二複句冗字可爲全璧之三者皆據行狀立言不可闕愚少受訓誨在卯翼中安忍先猷不彰而以固陋致失當年面目以自外於先型耶寂坐數日注思存想然後泚筆追述卽不能文而生平實跡恍在眉端頗稱詳備固知愚於此情系骨肉何敢忘報之萬一也行狀誌銘傳二本並原誌銘碑傳二本

專人送到須再質之高明細加論定毋忽臨穎馳切

上學使愚菴李洗馬

仰望雲章如景龍光而慕鳳采日思一奉顏色以消鄙陋
迺以奉檄查賑不容刻緩督催稍遲卽屬曠職僕僕往來
於十八州邑中殆無寧晷恐不能拱候憲臨卽一聞報雖
兼程回迓萬一不及有失屬員趨承之禮豫此謹稟伏乞
天度包涵俯垂藻鑑矜不得已之情而曲宥之頂戴不啻
在教育中也區區下情容叩見時泥首詳陳臨稟曷勝主
臣

答毛大可太史

前一函想達記室倏又新秋薦爽益增饑渴風塵鞅掌吏
俗可知而天際真人時切馳戀獨是南北懸隔弗獲躬親
渥誨然而蒼生重望恐東山非久卧地則奉教又自可期
耳拜誦佳序獎譽過深意者元晏先生扶掖人倫之意驚
音借不朽矣感謝感謝讀新篇若明河珠斗照破寂幽令
人目幾眩益愧拙稿之嚼蠟也便鴻肅候南望江雲可勝
浩慕不盡

寄董靖之

由來端良契合原在尋常形迹外視彼世俗要結雖日握手把臂未足以言聲氣也吾輩道義相許忠孝相成千里同心山河雖阻不能域其感通亦何俟謀面哉久慕高雅知肝膈皎然如玉特以雲龍隱見莫知常處是以有願識荆執鞭未遂近幸阜邑錢令無意中道及始知大賢動定能不仰止以慰遐思縞紵微忱聊比緇衣幸惟鑒茹斯見吾輩道義之孚不同要結之私也白水青松永失寤寐臨

穎曷勝景企

答子大何太史

上學使愚庵李洗馬

玉露初零金飈薦爽台臺福履佳勝可知緬自春仲案臨瀛郡十八屬文章禮樂蒼然丕變而今碑猶在口無如簡褻殊甚每一念及中心耿耿某謬叨庇蔭寵光已極兼承道義骨肉之雅雲天豈云高哉感勒之私何可言喻獨是久缺通候疎節之愆難以自逭而風塵鞅掌勞憊難堪台臺或亦諒於形迹外耳雁字橫空秋色滿地伊人之想那能不對葭露而深溯洄耶肅候近祉暨闔府清吉臨穎可勝依切

與蕭介石學士

荷珠榴火景入南薰駕步鸚歌都撩遠緬定知先生高尚
東山倍添佳興也弟因查賑牛馬風塵未能仰候尊太夫
人起居安善殊失晚輩職分目今賑事雖竣而案頭堆積
如山手目並營起自雞鳴至漏下十二刻猶勞勞不得休
疎節之愆在先生自能原鑒在弟則何以自安也敬遣小
力跪問尊太夫人萬安奉獻人參八兩稍佐木苓兼托八
行並詢先生近祉寸芹侑函幸惟海納

與東郡祖洪九

弟自入春後奉檄查賑僕僕塵埃中無片晷暇遂致鱗鴻
疎濶然每念大德未嘗不馳神左右先兄從祀鄉賢實賴
鼎力表彰累世頂戴豈區區效飼花雀僅以銜環報哉金
姪孫輩與一友人欲由遺才觀場敢望齒頰及之俾得逐
隊棘闈倘獲寸進皆荷生成也百金暫酬慨貸展効之私
總無萬一肅此布謝臨穎瞻馳

與彭孝緒

忽思張尚書二影妙句政在春夏之交意欲聊拈數首以備一體苦無好譜倘有珍藏幸付一觀拙稿或有一二本經郢削者祈先擲示仍卽附存此如醜女傅粉急欲得明鏡以自妍也當一鼓掌

上佛制臺

前具蕪稟特遣小仵匍叩新禧諸凡蟻曲諒達憲鑒不敢瑣瀆惟是遠違憲慈朝夕不聆教誨是以西望華峰益深瞻企頃閱邸抄捧讀籌秦第八疏計慮周詳言言石畫利弊之端晰若秋毫所謂計謨定命萬世攸賴者也但爲國杼籌固宜竭慮而惜精養力又當節勞旣一身係天下之重則萬姓仰磐石之安此某所以私心拳拳頌禱而不置者耳因世兄趨庭之便附稟恭候憲安至於疎節於世兄處某自顧增尤惟憲恩爲能原宥也

答方伯李駿公

昔側下僚叨庇已久不啻文昌之於昌黎也一自天路泥塗分懸南北攀仰無從凄神蕩魄者數年詎意太老先生仙逝更深慘惻哲人云亾邦國殄瘁卽欲躬趨苦次少申弔唁而職守羈縻兼以疾苦累月遂至疎怠罪難自遏反蒙遠辱顧問感愧益增罔極之悲萬祈少節特抒誅語暨菲薦遣价跼陳冀代披宣靈座如在之誠或賜歆格其席幽光也多矣臨啓曷勝懇切

東邵大叅子昆

老年臺碩德弘才屢著聲績雖古之潁川渤海何以加焉今又秉節畿輔八郡已臻上理鼎彝竹帛奚足云酬行將不次登庸赤社黃扉在指顧間耳弟碌碌海東終年勞瘁無可稱述比之年臺奚啻天淵惟是撫躬敬惕不忘國是昔人云物阜民康之時卽君子道亨之日此弟以自信亦以之信年臺也戀慕之私非筆舌所能罄臨楮曷勝翹切

東武太守天柱

老年臺水壺秋映暘谷春生羣黎傾愛日之忱四郊奏豐
年之瑞治稱卓異政有餘閒遙想風標時深仰企弟恨無
縮地之能徒有望雲之念蒼兼白露我勞如何不知年臺
亦曾意齊東有故人否龔黃之績久已達於九重樞省
台垣行當高置一座矣仰切仰切羽便附候聊陳積愫不

宣

寄馬開一

別幾三載未獲一晤伊人天際我懷如何每對暮雲春樹
屋梁落月輒不禁交臂把袂之思而吾兄高自矜重不肯
枉顧豈泥塗俗吏不足當達者之胸臆耶抑艱於跋涉而
畏行李之累耶弟雖窮宦尚足供行役之資吾兄竟恣然
乃爾耶幾欲崙人詢候適霖公弟至知闔宅安祥曷勝欣
慰惟靜掃塵榻以俟光臨積想之私容當面罄臨楮翹切

